

詩

古

微

魏氏源詩古微有初刻二刻本年初刻本僅上下
二卷係未完本年有李中者先生序二刻本分上中
下三編凡二十卷有魏氏自序為道光二十年所刻
久毀校兵頗不易得今坊間通所者為光緒己酉
官都楊氏飛青閣刻本仍分上中下三編上編三
卷一卷為詩四家異同二卷為詩序集義三卷為
夫子正集及毛詩四始義例中編仍分十卷排明道
光年上編三四五六卷併入下編二卷為詩外傳演
并表首共為十六卷上道光刻二十卷本年大并魏
氏自序有云詩古微上編十六卷并卷首一卷通語

全經大雅中編十卷卷同逐車搜雅下編三卷其
一輯古序其二漢井傳氏為卷二十蓋魏氏定本
以此今楊刻本乃頭有并同不知何所據也據魏
序云：目以直无本乃正楊刻本古序不相應也
魏氏意去氏國三年六月在殿肄覓詩直无刻
本用楊刻本校記載著其并同以此甘肅戶記

序

詩古微上編六卷并卷首一卷通語全經大誼中編十卷
答問逐章疑難下編三卷其一輯古序其二演外傳凡爲
卷二十詩古微何以名曰所以發揮齊魯韓三家詩之微
言大誼補苴其罅漏張皇其幽渺以豁除毛詩美刺正變
之滯例而揭周公孔子制禮正樂之用心于來世也蓋自
四始之例明而后周公制禮作樂之情得明乎禮樂而后
可以讀雅頌自迹熄詩亡之誼明而后夫子春秋繼詩之
誼章明乎春秋而后可以讀國風正變之例不破則雅頌
之得所不著而禮樂爲無用也美刺之例不破則國風之

無邪不章而春秋可不作也。禮樂者治平防亂自質而之文。春秋者撥亂返治由文而返質。故詩之道必上明乎禮樂。下明乎春秋。而後古聖憂患天下來世之心不絕于天下。學問之道不憤不啟。不悱不發。不以一隅反三隅。則不復。余初治詩于齊魯韓毛之說。初無所賓主。顧人之既久。礙于此者通于彼。勢不得不趨于三家。始于礙者卒于通。三家實則一家。積久豁然。全經一貫。朋亡蒞祛。若牖若告。憤悱啟發之功也。舉一反三之功也。學問之道固不可淺遇。而可深逢者也。雖然。詩教止于斯而已乎。昔者子夏彈琴以詠先王之風。有人亦樂之。無人亦樂之。至于發憤忘食。

然夫子猶造然變容曰子已見其表未見其裏闔其門不入于中安知其奧藏之所在乎邱嘗悉心盡志以入其中前有高岸後有深谷填填正立而已不能見其裏此所謂精微者也精微者何吾心之詩也非徒古人之詩也無聲之樂無體之禮無服之喪志氣橫乎天地周乎寢興食息察乎人倫庶物魚川泳而鳥雲飛也郊天假而廟鬼享也不反乎性則情不得其原情不得其原則文不充其物何以達性情於政事融政事於性情乎故汭流多則潛泳少矣遡風優則適性微矣徒賓賓然餽糟粕黨枯朽而曰詩教止斯已乎烏乎以俟假年以俟來哲

道光二十載歲次庚子邵陽魏源敘于揚州絜園

詩古微目錄

卷首

此卷楊氏飛青園刻今同

魯詩傳授攷

齊詩傳授攷

韓詩傳授攷

毛詩傳授攷

上編一

此卷楊氏祇有齊魯韓毛并同論而夫子正樂論則列入上編三

通論傳詩異同

齊魯韓毛并同論而夫子正樂論則列入上編三

通論詩樂

夫子正樂論上中下三篇

上編二

此卷楊氏列詩序集義其毛詩成例四始義例列入上編三

通論毛詩

毛詩義例上中下

通論四始

四始義例上中下

上編三

上編三四五六各篇楊本均係入中編各卷中

通論二南

二南義例篇上中下楊本列中編一

通論王風

王風義例篇上中下楊本列中編四

通論衛風

衛風義例篇上中下楊本列中編二

通論豳風

豳風義例篇上中下楊本列中編四

上編四

上編四五兩卷楊本列中編五

通論二雅

二雅義例篇上中下小雅宣王詩黃微

上編五

通論二雅

卷十雅也王序黃微上下交雅也西國王凡黃微大雅也

上編六

此美揚年列中編九中編十

通論三頌

四頌而次黃微上下交雅也西國王凡黃微大雅也

中編一

二南答問

中編二

衛風答問

中編三

檜鄭答問

齊風答問

魏唐答問

中編四

秦風答問

陳曹答問

幽王答問

中編五

小雅答問上

中編六

小雅答問下

中編七

大雅答問上

中編八

大雅答問下

中編九

周頌答問

中編十

魯頌答問

商頌答問

下編一

此處楊本移入上編二

詩序集義

下編二

此表揚字下編一

詩外傳演

輯古

下編三

此表揚字下編二

詩外傳演

取王夫之詩廣傳

詩古微卷首

邵陽魏源輯

魯詩傳授攷

漢書儒林傳申公

名培

魯人也少與楚元王交俱事齊人浮

邱伯受詩漢興高祖過魯申公以弟子從師入見于魯南

宮呂太后時浮邱伯在長安楚元王遣子郢

卽郢客

與申公

俱卒學元王薨郢嗣立爲楚王令申公傳太子戊戊不好

學病申公

病患苦也

及戊立爲王胥靡申公

相係而作役也

申公媿之

歸魯退居家教終身不出門復謝賓客獨王命召之乃往

弟子自遠方至受業者千餘人申公獨以詩經爲訓故以

教亡傳

口說其指不
爲書傳也

疑者則闕弗傳。蘭陵王臧既從受詩。

已通事。景帝爲太子少傅。免去。武帝初卽位。臧迺上書宿衛。累遷一歲至郎中令。及代趙綰。亦嘗受詩。申公爲御史大夫。綰臧請立明堂以朝諸侯。不能就其事。迺言師申公。于是上使使束帛加璧安車。以蒲裹輪。駕駟迎申公弟子二人乘輅傳從。至見上。上問治亂之事。申公時已八十餘。老對曰。爲治者不在多言。顧力行何如耳。是時上方好文辭。見申公對默然。然已招致。卽以爲太中大夫。舍魯邸。議明堂事。太皇竇太后喜老子言。不說儒術。得綰臧之過。以讓上曰。此欲復爲新垣平也。上因廢明堂事。下綰臧吏皆

自殺申公亦病免歸數年卒弟子爲博士十餘人孔安國
至臨淮太守周霸膠西內史夏寬城陽內史碭魯賜東海
太守蘭陵繆生長沙內史徐偃膠西中尉鄒人闕門慶忌
膠東內史其治官民皆有廉節稱其學官弟子行雖不備
而至于大夫郎掌故以百數申公卒以詩春秋授而瑕邱
江公盡能傳之徒眾最盛及魯許生免中邑名徐公皆守學
教授韋賢字長孺魯國鄒人治詩事大江公及許生又治禮至丞
相傳子元成字少翁以淮陽中尉論石渠後亦至丞相元
成及兄子賞以詩授哀帝至大司馬車騎將軍自有傳由
是魯詩有韋氏學

王式字翁思東平新桃人也。事免中徐公及許生。式爲昌
邑王師。昭帝崩。昌邑王嗣立。以行淫亂廢。昌邑羣臣皆下
獄誅。唯中尉王吉郎中令龔遂以數諫減死。論式繫獄當
死。治事使者責問曰。師何以亡諫書。式對曰。臣以詩三百
五篇朝夕授王。至于忠臣孝子之篇。未嘗不爲王反復誦
之也。至于危亡失道之君。未嘗不流涕爲王深陳之也。臣
以三百五篇諫。是以亡諫書。使者以聞。亦得減死。論歸家。
不教授。山陽張長安幼君。先事式。後東平唐長賓沛褚少
孫亦來事式。問經數篇。式謝曰。聞之于師具是矣。自潤色
之。不肯復授。唐生褚生應博士弟子選。詣博士。捫衣登堂。

頌

讀爲容

禮甚嚴。試誦說有法。疑者邱蓋不言。

邱孔子諱微孔子蓋闕如

也之訓也

諸博士驚問何師。對曰事式。皆素聞其賢。共薦式。詔

除下爲博士。式徵來。衣博士衣而不冠。曰刑餘之人。何宜

復充禮官。既至止舍中。會諸大夫博士。共持酒肉勞式。皆

注意高仰之。博士江公世爲魯詩宗。至江公著孝經說。心

嫉式。謂歌吹諸生曰。歌驪駒式。曰聞之于師。客歌驪駒。主

人歌客毋庸歸。今日諸君爲主人。日尙早。未可也。江翁曰。

經何以言之。式曰。在曲禮。江翁曰。何狗曲也。式恥之。陽醉

邊墜。

邊墜也墜古地字

式客罷。讓諸生曰。我本不欲來。諸生彊勸

我。竟爲豎子所辱。遂謝病免歸。終于家。張生唐生褚生皆

為博士。張生論石渠至淮陽中尉。唐生楚太傅。由是魯詩

有張唐褚氏之學。張生兄子游卿為諫大夫。以詩授元帝。

其門人琅邪王扶為泗水中尉。陳留許晏字偉君為博士。由

是張家有許氏學。初薛廣德字長卿沛郡相人亦事王式。以博士

論石渠授龔舍。廣德至御史大夫。舍泰山太守。皆有傳。按薛

廣德傳以魯詩教授。楚國龔勝舍師事焉。為人溫雅。有醜

藉為御史大夫。直言諫諍。龔勝字君賓。舍字君倩。俱楚

人。皆好學明經。勝為渤海太守。舍光祿大夫。歸鄉里。以魯

詩教授。郡二千石長吏初到官。皆至其家。如師弟子之禮。

舍居攝中卒。勝為莽召不屈死。

漢書楚元王傳名交字游。高祖同父少弟也。好書。多材藝。

少時嘗與魯穆生白生魯奄里人申公俱受詩于浮邱伯。秦時儒生

伯者孫卿門人也。

孫卿姓荀名况。爲楚蘭陵令。

及秦焚書各別去。漢六

年立交爲楚王。元王旣至楚。以穆生白生申公爲中大夫。高后時。浮邱伯在長安。元王遣子郢客與申公俱卒業文。帝時聞申公爲詩最精。以爲博士。元王好詩。諸子皆讀詩。申公始爲詩傳。號魯詩。元王亦次之。詩傳號曰元王詩。世或有之。元王立二十三年薨。郢客嗣。是爲夷王。申公爲博士。失官。隨郢客歸。復以爲中大夫。初元王敬禮申公等。穆生不耆酒。元王每置酒。常爲穆生設醴。及夷王子戊卽位。常設。後忘設焉。穆生退曰。可以逝矣。醴酒不設。王之意怠。不去。楚人將鉗我于市。稱疾臥。申公白生強起之曰。獨不

念先王之德與。今王一旦失小禮。何以至此。穆生曰。易稱知幾其神乎。幾者。動之微。吉凶之先見者也。先王之所以禮吾三人者。爲道之存故也。今而忽之。是忘道也。遂謝病去。申公白生獨留。王戊稍淫暴。二人諫不聽。胥靡之衣之赭衣。使杵臼雅舂于市。

元王孫辟彊。字少卿。亦好讀詩。能屬文。常以書自娛。不肯仕。子德爲宗正。孫向。字子政。通達。能屬文。辭明經。有行。嘗上封事。宏恭石顯怨之。成帝卽位。詔向領校中五經秘書。向爲洪範五行傳十一篇。爲王氏發也。上知其忠。不能用。又諫昌陵制度泰奢。又累以災異譏刺王氏。及在位大臣。

又爲列女傳八篇。新序說苑五十篇。官中壘校尉長子。伋以易教授。官郡守。少子歆最知名。

後漢書卓茂傳。茂字子康。南陽宛人。事博士江公。習詩禮。究極師法。稱爲通儒。光武時爲太傅。封褒德侯。

後漢獨行傳。李業字巨游。廣德梓潼人。少有志操。習魯詩。事博士許昆。元始初除郎。王莽居攝。去官。公孫述徵之。不屈死。光武表其閭。

後漢魯恭傳。恭字仲康。扶風平陵人。與弟丕入太學。習魯詩。閉戶講誦。絕人間事。兄弟俱爲諸儒所稱。爲魯詩博士。由是家法學者日盛。後歷官司徒。

言下
丕字叔陵兼通五經以魯詩尚書教授爲當世名儒關東
號曰五經復興魯叔陵和帝因朝會召見諸儒丕與侍中
賈逵尚書令黃香相難數事帝善丕說

後漢儒林傳高詡字季回平原般人也曾祖父嘉以魯詩
授元帝仕至上谷太守父容少傳家學哀平間爲光祿大
夫詡以父任爲郎中世傳魯詩以信行清操知名王莽篡
位父子稱盲逃不仕莽世光武卽位大司空宋宏薦詡徵
爲郎除符離長去官後徵爲博士建武十一年拜大司農
在朝以方正稱

包咸字子良會稽曲阿人少爲諸生師事博士右師細君

習魯詩

魏應字君伯任城人少好學習魯詩閉門誦習不交僚黨舉明經除濟陰王文學以疾免官教授山澤中徒眾常數百人建初中入授千乘王伉應經明行修弟子自遠方至著錄數千人時會京師諸儒于白虎觀講論五經同異使應專掌難問侍中淳于恭奏之帝親臨稱制如石渠故事明年出爲上黨太守徵拜騎都尉卒于官

後漢方術樊英傳注李昺字子然鄆人篤行好學習魯詩公車徵不就

後漢獨行傳陳重字景公豫章宜春人少與郡人雷義鄆陽

人爲友俱學魯詩官侍御史

案義字仲公
官南頓令

後漢胡廣傳注李咸字元卓汝南西平人學魯詩官太尉
蔡邕集蔡朗陳留人以魯詩教授生徒雲集爲瑯琊王太
傳

隸釋司隸校尉魯峻碑峻字仲嚴山陽昌邑人治魯詩兼
通嚴氏春秋

執金吾丞武榮碑榮字含和治魯詩韋君章句

齊詩傳授攷

漢書儒林傳轅固齊人也以治詩孝景時爲博士竇太后
好老子書召問固固曰此家人言耳太后怒曰安得司空

城旦書乎。迺使固入圜擊箠。上知太后怒而固直言無罪。迺假固利兵。下圜刺箠。正中其心。箠應手而倒。太后默然。亡以復罪。後上以固廉直。拜爲清河太傅。疾免。武帝卽位。已九十餘矣。復以賢良與公孫宏同徵。宏仄目事固。固曰。公孫子務正學以言。無曲學以阿世。諸齊以詩顯貴。皆固之弟子也。昌邑太傅夏侯始昌最明。自有傳。

后蒼字近君。東海郟人也。事夏侯始昌。始昌通五經。蒼亦通詩禮。爲博士。至少府。授翼奉。蕭望之。匡衡奉爲諫大夫。望之前將軍。衡丞相。皆有傳。衡授琅邪師丹。伏理旂君。潁川滿昌君都。君都爲詹事。理高密太傅。家世傳業。丹大司

空自有傳。由是齊詩有翼匡師伏之學。滿昌授九江張邯。琅邪皮容皆至大官。徒眾尤盛。

漢書夏侯始昌傳。始昌魯人。通五經。以齊詩尙書教授。自董仲舒韓嬰死後。武帝得始昌。甚重之。始昌明陰陽。爲昌邑王太傅。

漢書翼奉傳。奉字少君。東海下邳人。治齊詩。與蕭望之匡衡同師。好律歷陰陽之占。待詔宦者署。嘗奏封事言。易有陰陽。詩有五際。春秋有災異。皆列終始。推得失。考天心。以言王道之安危。應劭曰。五際。君臣父子夫婦兄弟朋友也。孟康曰。詩內傳曰。五際。卯酉午戌亥也。陰陽終始際會之歲。子後爲諫大夫。子孫皆以學在儒官。此則有變改之政也。

漢書蕭望之傳望之字長倩東海蘭陵人好學治齊詩事
同縣后蒼且十年以令詣太常受業復事同學博士白奇
又從夏侯勝問論語禮服京師諸儒稱述焉後以論語禮
服授皇太子爲前將軍輔元帝忤宏恭石顯下吏自殺
漢書匡衡傳衡字稚圭東海承人家貧好學精力過絕人
諸儒爲之語曰毋說詩匡鼎來也鼎方匡說詩解人頤蕭望
之奏衡經學精習說有師道可觀覽宣帝不甚用儒遣歸
之元帝卽位爲給事中子咸亦明經歷位九卿家世多爲
博士者

漢書師丹傳丹字仲公琅琊東武人也治詩事匡衡舉孝

廉爲郎後爲大司空哀帝時書數十上多切直之言議定
陶共王廟不合上意以事策免

漢書藝文志齊孫氏故二十七卷傳二十八卷

後漢馬援傳援字文淵扶風茂陵人嘗受齊詩意不能守

章句

東觀記曰師
穎川滿昌

伏波將軍封新息侯

後漢伏湛傳湛字惠公瑯琊東武人九世祖勝字子賤所
謂濟南伏生者也父理當世名儒以詩授成帝別自名學
湛少傳父業教授數百人成帝時以父任博士弟子建武
三年代鄧禹爲大司徒帝將親征彭寵湛諫曰臣聞文王
受命而征伐五國

謂犬夷密須
耆邦崇也

必先詢之同姓然後謀之

羣臣加占蓍龜以定行事其詩曰帝謂文王詢爾仇方同爾兄弟以爾鉤援與爾臨衝以伐崇墉崇國城守先退後攻所以重人命俟時而動陛下受命四年而滅檀鄉制五校降銅馬破赤眉誅鄧奉之屬不爲無功今京師空匱資用不足而先事邊外捨近務遠百姓恐懼誠臣之所惑也後坐事策免元孫無忌傳家學永和中與議郎黃景校定中書五經諸子百家藝術

後漢儒林傳伏恭字叔齊瑯琊東武人司徒湛之兄子也湛弟黯字稚文以明齊詩改定章句作解說九篇位至光祿勳無子以恭爲後恭性孝事所繼母甚謹少傳黯學以

任爲郎建武四年除劇令視事十三年以惠政公廉聞青州舉爲尤異太常試經第一拜博士遷常山太守敦修學校教授不輟由是北州多爲伏氏學永平二年代梁松爲太僕四年帝臨辟雍于行禮中拜恭爲司空儒者以爲榮初父黯章句繁多恭迺省減浮辭定爲二十萬言在位九年以病乞骸骨罷詔賜千石奉以終其身十五年行幸瑯琊引遇如三公儀建初二年冬肅宗行饗禮以恭爲三老年九十元和元年卒賜葬顯節陵下子壽官至東郡太守任末字叔本蜀郡繁人也少習齊詩遊京師教授十餘年友人董奉德于洛陽病亡末迺躬推鹿車載奉德喪致其

墓所由是知名爲郡功曹辭以病免後奔師喪于道物故
臨命敕兄子造曰必致我尸于師門使死而有知魂靈不
慙如其無知得土而已造從之

景鸞字漢伯廣漢梓潼人也少隨師學經涉七州之地能
理齊詩施氏易兼受河洛圖緯作易說及詩解文句兼取
河洛以類相從名爲交集又撰禮內外記號曰禮略又鈔
風角雜書列其占驗作興道一篇及作月令章句凡所著
述五十餘萬言數上書陳救災變之術州郡辟命不就以

壽終

後漢陳寶傳陳紀字元方潁川許人位大鴻臚

毛學指說以爲亦學

齊詩

韓詩傳授攷

漢書儒林傳韓嬰燕人也孝文時爲博士景帝時至常山太傅嬰推詩人之意而作內外傳數萬言其語頗與齊魯間殊然歸一也淮南賁生受之燕趙間言詩者由韓生韓生亦以易授人推易意而爲之傳燕趙間好詩故其易微唯韓氏自傳之武帝時嬰嘗與董仲舒論于上前其人精悍處事分明仲舒不能難也後其孫商爲博士孝宣時涿郡韓生其後也以易徵待詔殿中曰所受易卽先太傅所傳也嘗受韓詩不如韓氏易深太傅故事傳之司隸校尉

蓋寬饒本受易于孟喜見豚韓生說易而好之卽更從受焉

趙子河內人也事燕韓生授同郡蔡誼誼至丞相自有傳誼授同郡食子公與王吉吉爲昌邑中尉自有傳食生爲博士授泰山栗豐吉授淄川長孫順順爲博士豐部刺史由是韓詩有王食長孫之學豐授山陽張就順授東海髮福皆至大官徒眾尤盛

髮一作段

後漢儒林傳薛漢字公子淮陽人也世習韓詩父子以章句著名漢少傳父業尤善說災異讖緯教授常數百人建武初爲博士受詔校定圖讖當世言詩者推漢爲長永平

中爲千乘太守政有異迹後坐楚事辭相連下獄死弟子
健爲杜撫會稽澹臺敬伯鉅鹿韓伯高最知名

杜撫字叔和健爲武陽人也少有高才受業于薛漢定韓
詩章句後歸鄉里教授沈靜樂道舉動必以禮弟子千餘
人後爲驃騎將軍東平王蒼所辟及蒼就國掾史悉補王
官屬未滿歲皆自劾歸時撫爲大夫不忍去蒼聞賜車馬
財物遣之辟太尉府建初中爲公車令數月卒官其所作
詩題約義通學者傳之曰杜君注云

召馴字伯春九江壽春人也曾祖信臣元帝時爲少府父
建武中爲卷令倣儻不拘小節馴少習韓詩博通書傳以

志義學聞鄉里號之曰德行恂恂召伯春累仕州郡辟司徒府建初元年稍遷騎都尉侍講肅宗拜左中郎將入授諸王帝嘉其義學恩寵甚崇出拜陳留太守賜刀劍錢物元和二年入爲河南尹章和二年代任隗爲光祿勳卒于官賜冢塋陪園陵孫休位至青州刺史

楊仁字文義巴郡閬中人也建武中詣師學習韓詩數年歸靜居教授仕郡爲功曹舉孝廉除郎太常上仁經中博士仁自以年未五十不應舊科上府讓選顯宗特詔補北宮衛士令引見問當世政迹仁對以寬和任賢抑黜驕戚爲先又上便宜十二事皆當世急務帝嘉之賜以兼錢及

帝崩時諸馬貴盛各爭欲入宮仁被甲持戟嚴勒門衛莫敢輕進者肅宗既立諸馬共譖仁刻峻帝知其忠愈善之拜什加令寬惠爲政勸課掾史弟子悉令就學其有通明經術者顯之右署或貢之朝由是義學大興懇田千餘頃行兄喪去官後辟司徒桓虞府掾有宋章者貪奢不法仁終不與交言同席時人畏其節後爲閬中令卒于官

趙華字長君會稽山陰人也少嘗爲縣吏奉檄迎督郵華恥于廝役遂棄車馬去到犍爲資中詣杜撫受韓詩究竟其術積二十年絕問不還家爲發喪制服華卒業迺歸州召補從事不就舉有道卒于家華著吳越春秋詩細歷神

淵蔡邕至會稽讀詩細而歎息以爲長于論衡邕還京師傳之學者咸誦習焉時山陽張匡字文通亦習韓詩作章句後舉有道博士徵不就卒于家

後漢馬援傳援同郡朱勃字叔陽年十二能誦詩書續漢書曰

勃能說韓詩

衣方領能矩步辭言嫺雅援裁知書見之自失以

雲陽令上書訟援爵土不傳書奏歸田里

後漢郅惲傳惲字君章汝南西平人光武令授皇太子韓詩爲上東門城侯尉

後漢劉寬傳寬字文饒宏農華陰人每行縣止息亭輒引學官祭酒及處士諸生執經對解靈帝初侍講華光殿

帝頗好學藝每令寬講經光和三三年爲太尉

謝承書曰尤明韓詩外傳

後漢廉范傳范字叔度京兆杜陵人詣京師受業事博士薛漢爲蜀郡太守漢坐楚事辭相連下獄死故人門生莫敢視范獨往收斂之

後漢周燮傳後南陽馮良字君郎奉檄迎督郵乃遁至犍爲從杜撫學積十許年乃還徵辟不就

後漢李恂傳恂字叔英安定臨涇人少習韓詩教授諸生常數百人拜武威太守

後漢文苑傳夏恭字敬公梁國蒙人習韓詩講授門徒常千餘人仕泰山都尉儒者諡爲宣明君夏牙恭之子少習

家業舉孝廉儒者諡爲文德先生

後漢鄭元傳元字康成北海高密人從東郡張恭祖受韓詩徵大司農

後漢梁商傳商字伯夏安定烏氏人徙茂陵以外戚爲大

將軍

東觀漢紀商少持韓詩

京師翕然稱爲良輔

後漢方術傳上廩扶字文起汝南平輿人與李恂皆習韓詩教授數百人父爲北地太守永初中坐羌沒郡下獄死扶感此遂絕志世外專精經典公府辟召皆不應人號爲北郭先生太守謁煥先爲諸生從扶學後臨郡未到先遣吏修門人之禮

後漢杜喬傳喬治韓詩

後漢方術傳下唐檀字子產豫章南昌人習韓詩官郎中
後漢方術傳下公沙穆字文父北海膠東人習韓詩尤銳
思河洛推步之術居建成山中依林阻爲室官遼東屬國
都尉

太平御覽引東觀漢紀陳囂字君期明韓詩時人語曰關
東說詩陳君期

東觀漢紀曰尹勤事親至孝無有交游治韓詩

隋經籍志侯包著韓詩翼要十卷

蜀志杜瓊傳瓊字伯瑜蜀郡成都人後主時爲大鴻臚著

韓詩章句十餘萬言

魏志崔玖傳玖字季珪清河東武城人讀論語韓詩結公

孫方等就鄭康成受學爲中尉

吳志張紘傳紘字子綱廣陵人爲會稽都尉

注事博士韓綜治京氏易

歐陽尚書又于外黃濮陽閭受韓詩禮記左氏春秋後爲孫權長史

隸釋廣漢屬國都尉丁魴碑魴字叔河治易韓詩垂意春秋

中常侍樊安碑安字子仲南陽湖陽人治韓詩論語孝經

兼通記傳

從事武梁碑梁字綏宗治韓詩

車騎將軍馮緄碑緄字皇卿治春秋嚴氏韓詩倉氏

郎中馬江碑江字元海通韓詩經

晉書儒林傳董景道字文博宏農人明韓詩精究大義隱
于商洛衣木葉食樹果彈琴歌嘯以自娛累徵不起

沈約集梁景字少景少習韓詩爲世通儒元嘉元年爲尚
書令

毛詩傳授攷

經典釋文引徐整云

三國吳人

子夏授高行子高行子授薛倉

子薛倉子授帛妙子帛妙子授河間人大毛公大毛公爲
詩敘訓傳于家以授趙人小毛公小毛公爲河間獻王博

十一云此見陸機草木蟲魚疏亦三國吳人子夏授曾申曾申傳魏人李克

李克傳魯人孟仲子孟仲子傳根牟子根牟子傳趙人孫卿子孫卿子傳魯人大毛公

漢書景十三王傳劉德景帝子河間王修學好古實事求是其學舉六藝立毛氏詩諡曰獻

漢書儒林傳毛公趙人也治詩爲河間獻王博士授同國貫長卿長卿授解延年延年爲阿武令授徐敖敖授九江陳俠爲王莽講學大夫由是言毛詩者本之徐敖

後漢儒林傳衛宏字敬仲東海人也少與河南鄭興俱好古學初九江謝曼卿善毛詩通爲其訓宏從曼卿受學因

作毛詩序善得風雅之旨今傳于世後從大司空杜林更受古文尚書爲作訓旨時濟南徐巡師事宏後從林受學亦以儒顯由是古學大興光武以爲議郎宏作漢舊儀四篇以載西京雜事又著賦頌誄七首皆傳于世中興後鄭衆賈逵傳毛詩後馬融作毛詩傳鄭元作毛詩箋

後漢鄭興傳子衆字仲師河南開封人通易詩官大司農

後漢儒林傳言鄭衆賈逵傳毛詩

後漢賈逵傳逵字景伯扶風平陵人曼卿弟子肅宗令撰

齊魯韓詩與毛同異爲侍中領騎都尉

隋志有毛詩雜議難十卷

後漢馬融傳融字季長扶風茂陵人從京兆摯恂學博通

經籍爲南郡太守作毛詩傳十卷

後漢鄭元傳元始學韓詩後善毛詩作毛詩箋徵大司農
蜀志許慈傳慈字仁篤南陽人師學劉熙善鄭氏學治易
尚書三禮毛詩論語

蜀志李譔傳譔字欽仲梓潼涪人父仁字德賢與尹默俱
遊荊州從司馬徽宋忠學譔具傳其業著古文易尚書毛
詩三禮左氏傳太元指歸皆依準賈馬異于鄭氏與王氏
殊隔初不見其所述而意歸多同爲右中郎將延熙初爲
中散大夫

譙周傳注引華陽國志文立字廣休巴郡人治毛詩三禮

兼通羣書官尚書

晉書作巴郡臨江人事譙周

魏志王朗傳子肅字子雍東海人善賈馬之學而不好鄭氏采會同異爲尚書詩論語三禮左氏解及撰定父朗所作易傳皆列于學官其所論駁朝廷典制郊祀宗廟喪紀輕重凡百餘篇時樂安孫炎受學鄭康成之門人稱東州大儒徵爲秘書監不就肅集聖證論以譏短康成炎駁而釋之炎作周易春秋例毛詩禮記春秋三傳國語爾雅諸注又注書十餘篇

肅有與鄭合注毛詩二十卷毛詩奏事一卷毛詩問難二卷毛詩注二十卷毛

詩義駁八卷見隋志

隋志毛詩駁一卷魏司空王基撰

按基字伯興東萊人康成弟子也

隋志毛詩義四卷毛詩箋傳是非二卷魏秘書劉璠撰

隋志毛詩義問十卷魏太子文學劉楨撰

按魏志東平劉楨字公幹

吳志諸葛瑾傳瑾字子瑜琅琊陽都人官大將軍

注少游京師治

毛詩尚書左氏春秋

吳志韋昭傳昭字宏嗣吳郡雲陽人少好學孫休時爲博

士祭酒

隋志昭作毛詩答問六卷作毛詩答雜問七卷與侍中宋育撰

隋志毛詩草木蟲魚疏二卷烏程令吳郡陸機撰

按機當作機字

元恪仕太子中庶子

隋志毛詩譜三卷吳太常卿徐整撰

又有舒援撰毛詩義疏二十卷不知何時

人

晉書儒林傳虞喜字仲寧會稽餘姚人釋毛詩略注孝經

爲志林三十篇凡所注述數十萬言以散騎常侍徵不起

晉書謝沈傳沈字行思會稽山陰人博學多識明練經史

著毛詩行于世仕著作郎隋志有謝氏毛詩譜一卷毛詩釋義十卷又毛詩答問駁譜合

入卷義疏十卷毛詩謝沈注二十卷

晉書江統傳後江惇字思俊陳留圉人好學儒元並綜東

晉徵士釋文有江惇詩音

隋經籍志難孫氏毛詩評四卷表隱二卷徐州從事陳統

撰志又有毛詩義疏五卷張氏撰不知何人

隋經籍志毛詩雜義四卷晉江州刺史殷仲堪撰仲堪史亡其字

東郡人

隋志毛詩拾遺一卷毛詩略四卷郭璞傳晉書郭璞傳字景純河東聞喜

人好經術博學有高才而納于言論詞賦爲中興之冠好古文奇字

隋經籍志毛詩辨異三卷毛詩異義二卷毛詩雜義五卷

晉給事郎楊乂撰字仲論豫章人

隋經籍志毛詩音隱一卷于寶撰字令升新蔡人晉散騎常侍

隋經籍志毛詩異同評十卷晉長沙太守孫毓撰毓字休明北海

平昌人

隋經籍志毛詩注二十卷晉兖州別駕江熙撰字太和濟陽考城人

經典釋文阮侃字德恕陳留人晉河內太守爲詩音

南史徐廣傳廣字野人東莞姑幕人家世好學至廣尤精

宋中散大夫

隋志有毛詩
隱義二卷

南史隱逸傳周續之字道祖雁門廣武人詣范甯受業通五經五緯號曰十經宋武帝爲開館東郭外招集生徒問以倣不可長與我九齡射于矍圃之義辯析精奧移病鍾山卒通毛詩六義及禮論注公羊傳行于世

南史隱逸傳雷次宗字仲倫豫章南昌人篤志好學尤明三禮毛詩不受徵辟元嘉中爲開館于雞籠山聚徒教授置生百餘人會稽朱膺之潁川庾蔚之並以儒學總監諸生後爲諸王喪服經子肅之頗傳其業

注見上

南史隱逸傳關康之字伯愉河東大陽人少而篤學晉陵顧悅之難王弼易義四十餘條康之申王難顧遠有情理又爲毛詩義經籍疑滯多所論釋尤善左氏春秋手自點定又造禮論十卷宋齊徵召皆不就

隋經籍志毛詩釋一卷宋金紫光祿大夫何偃撰南史何尚之傳

子偃字仲宏

隋經籍志業詩二十卷宋奉朝請葉遵撰立義多異世所不行

隋經籍志毛詩序注一卷宋交州刺史阮珍之撰

隋經籍志毛詩引辨一卷序義七卷宋奉朝請孫暢之撰南史南齊劉瓛傳字子珪沛郡相人篤志好學博通訓義

作毛詩敘十卷齊武帝歷徵不就隋志劉瓛撰毛詩序義疏三卷毛詩篇次義一

卷毛詩雜義注三卷

南齊書顧歡傳字景怡吳郡鹽官人篤志好學家貧然松節讀書或然糠自照永明初徵博士不就著毛詩集解敘義一卷又注王弼易二繫

隋志毛詩發題序義一卷毛詩大義十一卷梁武帝撰又十五國風義二十卷梁簡文帝撰

梁書儒林傳崔靈恩清河東武城人少篤學徧習五經梁天監中除國子博士注毛詩二十四卷

梁書儒林傳伏曼容字公儀平昌安邱人爲毛詩集解梁

中散大夫

梁書儒林傳嚴植之字孝源建平秭歸人治毛詩天監四年兼五經博士六年遷中領軍記室參軍

賀革字文明會稽山陰人治毛詩爲南郡太守

梁書何允傳允字子季廬江灊人師事沛國劉瓛撰毛詩總集六卷毛詩隱義十卷

梁書許懋傳懋字昭哲高陽新城人篤志好學撰毛詩風雅比興義十五卷盛行于世

梁又有陶宏景毛詩序一卷見隋志

南史儒林傳顧越字允南吳郡鹽官人深明毛詩旁通異義除五經博士梁亡入周所著春秋毛詩老子孝經論語

等義疏四十餘卷。時有東陽龔孟舒者，亦通毛詩。仕梁爲潁陽郡丞。

隋志：毛詩檢漏義二卷，梁給事郎謝曇濟撰。

陳書：張譏傳，字直言，清河武城人，撰毛詩義二十卷。

北史：儒林傳序，通毛詩者多出於魏朝劉獻之。獻之傳李

周仁，字陽人。

周仁傳：董令度程歸則。

渤海人

程歸則傳：劉敬和

渤海人

張思伯、劉軌思。

渤海人

其能言詩者多出二劉之門。

北魏書：儒林傳，劉獻之，博陵饒陽人，雅好詩，傳注毛詩敘

義一卷，章句疏三卷，舉孝廉不就。

按北史儒林傳：獻之劉受毛詩于渤海程元。劉

爰古，參古獻之子，傳父詩，不能精通也。

北史儒林傳劉蘭武邑人受毛詩于中山王保安先是張
吾貴以聰辯過人解說不本先儒之旨蘭推經注之意參
以緯候及先儒舊事甚爲精悉永平中爲國子助教
徐遵明字子判華陰人師屯留王聰受毛詩又師張吾貴
及范陽孫買德鄭康成論語序云書以八寸策誤作八十
宗遵明因曲爲之說其僻皆如此獻之吾貴又甚焉教授
不仕

董徵字文發頓邱衛國人師清河監伯陽受毛詩大義精
練授京兆清河廣平汝南四王經贈左僕射諡文烈

北魏劉芳傳芳字伯文彭城人楚元王後爲國子祭酒延

昌初贈鎮東將軍諡文貞撰毛詩箋音義證十卷

魏書元延朗傳安豐王猛子博極羣書兼有文藻撰詩禮

別義注

隋志後魏安豐王毛詩詁府三卷

北魏書盧景略傳略字仲儒范陽涿人也注毛詩未訖與

和中補齊王開府屬

北史作景裕

北周書儒林傳沈重字德厚吳興武康人博覽羣書尤明

詩後梁大常卿著毛詩義二十八卷音二卷

樂遜字遵賢河東猗氏人魏廢帝二年與諸儒分授經業

遜講毛詩周大象中進開府儀同三司

北史儒林傳北齊李鉉字寶鼎渤海南皮人撰毛詩義疏

師李周仁徐遵明用心精苦三秋冬不畜枕每睡假寐而已燕趙間能言經者多出其門徵詣晉陽師友諸王剛正六藝謬字名曰字辯贈廷尉少卿

劉軌思渤海人說詩甚精少事同郡劉敬和仕齊國子博士

北齊張思伯河間樂城人爲毛詩章句教授齊安王廓位國子博士

隋書儒林傳劉炫字光伯河間景城人眸子精明視日不眩強記默識莫與爲儔左畫圖右畫方口誦耳聽目數五官並用作毛詩述義四十卷注詩序一卷隋直門下省

隋志

言下
又有炫及太叔求注詩譜二卷炫又有毛詩集小序一卷

魯世達餘杭人煬帝時爲國子助教撰毛詩章句義疏四

十二卷

隋志又有毛詩注并音八卷

北史文苑傳王貞字孝逸梁郡陳留人少聰敏七歲好學善毛詩禮記左氏周易開皇初舉秀才授縣尉謝病于家潘徽字伯彥吳郡人少受禮于鄭灼受毛詩于施公受書于張冲講老莊于張譏並通大義尤精三史爲新蔡國王侍郎選爲客館令後入隋卒

按隋志總計韓毛詩三十九部四百四十二卷亡書合七十六部六百八十三卷而魯齊二詩無一卷存者志

以毛詩爲古學然則三家詩亦猶書之今文歟

詩古微卷首終

詩古微上編之一

邵陽魏源撰

齊魯韓毛異同論上

漢興詩始萌芽。齊魯韓三家盛行。毛最後出。未立博士。蓋自東京中葉以前。博士弟子所誦習。朝野羣儒所稱引。咸于是乎在。與施孟梁邱之易。歐陽夏侯之書。公羊穀梁之春秋。並旁薄宇宙者幾四百年。末造而古文之學漸興。力創博士今文之學。然肅宗令賈逵撰齊魯韓毛異同。六朝崔靈恩作毛詩集注。皆兼采三家。使其書並傳。切劘六義。羽翼四始。詎不羣燎之燭。長夜眾造之證疑獄也哉。鄭康

成氏少習韓詩晚歲舍韓箋毛及鄭學大昌毛遂專行于世人情黨盛則抑衰孤學易擯而難輔于是齊詩魏代卽亡魯詩亡于西晉韓詩唐宋尙存新書藝文志崇文總目猶載其書御覽集韻多引其文而久亦亡于北宋物極必反情鬱思申于是攻毛議序者亦起于北宋不揣其本兩敗俱傷天之將喪斯文也夫何怪歟辯生于末學言止于甌夷要其矯誣三家者不過三端曰齊魯韓皆未見古序也毛詩與經傳諸子合而三家無證也毛序出子夏孟荀而三家無攷也請一一破其疑起其墜以質百世程大昌曰三家不見古序故無以總測篇意毛惟有古序以該括

章旨故訓詁所及會全詩以歸一貫然攷新唐書藝文志韓詩二卷卜商序韓嬰注而水經注引韓詩周南敘曰其地在南郡南陽之間至諸家所引韓詩如關雎刺時也漢廣說人也汝墳辭家也芣苢傷夫有惡疾也黍離伯封作也蝦蟇刺奔女也溱與洧說人也雞鳴讒人也夫移燕兄弟也伐木文王敬故也鼓鐘刺昭王也賓之初筵衛武公飲酒悔過也抑衛武公刺王室以自戒也假樂美宣王之德也雲漢宣王遭亂仰天也雨無極正大夫刺幽王也四月歎征役也閟宮有恤公子奚斯作也那美襄公也皆與毛詩首語一例則韓詩有序明矣齊詩最殘缺而張揖魏

人習齊詩。其上林賦注曰。伐檀刺賢者不遇明王也。其爲齊詩之序明矣。劉向楚元王孫世傳魯詩。其列女傳以芣苢爲蔡人妻作。汝墳爲周南大夫妻作。行露爲召南申女作。邶柏舟爲衛大夫作。碩人爲莊姜傅母作。燕燕爲定姜送婦作。式微爲黎莊夫人及傅母作。載馳爲許穆夫人作。視毛序之空衍者尤鑿鑿不誣。且其息夫人傳曰。君子故序之于詩。黎莊夫人傳曰。君子故序之以編詩。而向所自著書亦曰新序。是魯詩有序明矣。且三家遺說。凡魯詩如此者。韓必同之。韓詩如此者。魯必同之。齊詩存什一于千百。而魯韓必同之。苟非同出一原。安能重規疊矩。三人占。

則從二人之言。謂毛不見三家古序。則有之。三家烏用見毛序爲哉。程氏其何說之詞。王氏引之曰。藝文志詩經二十八卷。魯齊韓三家。蓋以十五國風爲十五卷。小雅七十四篇爲七卷。大雅三十一篇爲三卷。三頌爲三卷。與毛卷同。而志言毛詩經故二十九卷者。毛以詩序別爲一卷。與三家之序冠各篇者異也。今魯齊二家序不可攷。韓詩序則楊震傳引。綴煉篇。御覽引黍離篇。皆以序與經文連引。則知不別爲卷矣。而毛又分周頌三十一篇爲三卷。故今詁訓傳爲卷三十也。案王氏說于漢志似符。而于新唐書志又不合。且韓詩邶鄘衛分合不可知。則以序二卷與十三國數之。亦適符漢志之數也。鄭樵曰。毛公時左傳孟子國語儀禮未盛行。而先與之合。世人未知毛詩之密。故俱從三家。及諸書出而證之。諸儒得以攷其異同得失。長者出而短者自廢。故皆舍三家而宗毛。應之曰。齊詩先采蘋而後草蟲。與儀禮合。小雅四

始五際次弟與樂章合。魯韓詩說碩人二子乘舟載馳黃
鳥與左氏合。說抑及昊天有成命與國語合。說騶虞樂官
備與射義合。說凱風小弁與孟子合。說出車采薇非文王
伐獼狁與尙書大傳合。大武六章次弟與樂章合。其不合
諸書者安在。而毛詩則動與牴牾。其合諸書者又安在。顧
謂西漢諸儒未見諸書。故舍毛而從三家。則太史公本左
氏國語以作史記。何以宗魯詩而不宗毛。賈誼劉向博極
羣書。何以新書說苑列女傳宗魯而不宗毛。謂東漢諸儒
得諸書證合。乃知宗毛而舍三家。則班固評論四家詩何
以獨許魯近。左傳由賈逵得立。服虔作解。而逵撰齊魯韓

毛詩異同。服虔注左氏鄭君注禮皆顯用韓詩。卽鄭箋毛亦多陰用韓義。許君說文敘自言詩稱毛氏皆古文家言。而說文引詩什九皆三家。五經異義論黜制論鄭風論生民亦並從三家說。豈非鄭許之用毛者。特欲專立古文門戶。而意實以魯韓爲勝乎。若云長者出而短者自廢。則鄭荀王韓之易賢於施孟梁邱。梅賾之書賢于伏生夏侯歐陽韓詩外傳賢於韓詩內傳左氏之杜預注賢于賈服。而佚書十六篇佚禮七十篇皆亡所當亡耶。至錢氏大昕據孟子勞于王事不得養父母爲孟子之用小序緇衣篇長民者衣服不貳從容有常爲公孫尼子之用小序則不如

據論語關雎樂而不淫哀而不傷爲夫子用小序之爲愈也。梅賾之僞古文書其亦三代經傳襲用梅氏耶。鄭氏其何說之詞。葉氏夢得謂漢文章無引毛序者惟魏黃初四年詔曰曹風刺遠君子近小人毛序至是始行于世陳氏啟源駁之謂司馬相如難蜀父老文王事未有不始于憂勤終于逸樂爲用魚麗序班孟堅東都賦大德廣之所及爲用漢廣序不知衛宏續序多剽取經傳陳言卽如首篇關雎憂在進賢不淫其色哀窈窕思賢才而無傷善之心卽穿鑿論語馬氏端臨曰譬之聽訟毛詩其左衽語詩義何論其他。證到案之人也。齊魯韓其逋亡無證不到案之人也。今所存魯韓遺說如以關雎爲畢公作以柏舟爲衛宣夫人作後儒皆不從之。夫同一魯韓詩也他敘可從而關雎柏舟之序獨不可從乎。應之曰詩三百五篇篇自爲案各不相

謀三家詩有亡逸者有到案者馬氏但就其所到之案虛公讞之可矣且其未到之案或可連類旁證比例互知者亦有之矣今以其有他案未到乃并其見存左證之百十案一切置之而惟毛詩一面之詞遂不煩他證不問是非虛實一切直之可乎關雎畢公柏舟衛宣皆後儒耳食道聽之譚非三家本旨各詳別篇四始義例篇特馬氏聽訟之未審耳馬氏又曰詩之見錄者必其序說明白而旨意可攷其刪佚不錄者必其序說無傳旨意難攷如其言是聖人折衷六藝衡鑒貿然惟以序說爲去取然狸首新宮之屬當以序不明而置之矣其所存二雅諸序當必與禮

樂相表裏。乃大雅正篇。莫一詳其樂章之所用。何耶。十三國之無正風。與燕蔡莒許杞薛之并無變風。旣皆以序不明而置之矣。則所存諸國之序。當必可爲詩史。乃國風小序。于史有世家者。皆傳之惡謚。至魏檜之史。無世家者。則但以爲刺其君其大夫。而無一謚號世次之可傳會。又何耶。其明白者。安在其出國史者。安在馬氏其何說之詞。姜氏炳璋曰。漢四家詩。惟毛公出自子夏。淵源最古。且魯頌傳引孟仲子之言。絲衣序別高子之言。北山序同孟子之語。則又出于孟子。而大毛公親爲荀卿弟子。故毛傳多用荀子之言。非三家所及。應之曰。漢書楚元王傳。言浮邱伯

傳魯詩于荀卿則亦出荀子矣。唐書載韓詩卜商序則亦出子夏矣。韓詩外傳高子問載馳之詩于孟子。孟子曰有衛女之志則可。無衛女之志則怠。又載荀卿非十二子篇獨去子思孟子。且外傳屢引七篇之文。則亦出孟子矣。故漢書曰。又有毛公之學。自言子夏所傳。自言云者。人不取信之詞也。至釋文引徐整云。

三國吳人

子夏授高行子。高行子

授薛倉子。薛倉子授帛妙子。帛妙子授河閒人大毛公。毛公爲詩敘訓傳于家。以授趙人小毛公。小毛公爲河閒獻王博士。一云子夏授曾申。申傳魏人李克。克傳魯人孟仲子。孟仲子傳根牟子。根牟子傳趙人孫卿子。孫卿子傳魯

人大毛公。夫同一毛詩傳授源流。而姓名無一同。且一以爲荀卿。一以爲不出荀卿。一以爲河閒人。一以爲魯人。展轉傳會。安所據依。豈非漢書自言子夏所傳一語。已發其覆乎。以視三家源流。孰傳信。孰傳疑。姜氏其何說之詞。劉子駿讓太常博士書曰。漢興詩始萌芽。至孝武皇帝。然後齊魯梁趙頗有詩禮春秋先師。一人不能獨盡其經。或爲風。或爲雅。或爲頌。相合而成。往者綴學之士。不思廢絕之闕。苟因陋就寡。分文析字。煩言碎辭。學者罷老。且不能究其一藝。信口說而背傳記。是末師而非往古。徒抱殘守缺。挾恐見破之私意。而無從善服義之公心。或懷嫉妬。不

攷情實雷同相從。隨聲是非。深閉固拒。欲以杜塞餘說。絕滅微學。豈不悲哉。禮失求諸野。古文不猶愈于野乎。若必專已守殘。黨同門。妬道真。甚爲二三君子不取也。白虎通義曰。異說並行。則弟子疑焉。天喪斯文。未墜于地。擇善而從。多見而志。聖人之道。猶有文質。所以擬其說。述所聞者。亦各傳所受而已。不識墨守諸君子。其何說之詞。

齊魯韓毛異同論中

甚哉美刺固毛詩一家之例而說者又多歧之以與三家燕越也夫詩有作詩者之心而又有采詩編詩者之心焉有說詩者之義而又有賦詩引詩者之義焉作詩者自道其情情達而止不計聞者之如何也卽事而詠不求致此者之何自也諷上而作但蘄上寤不爲他人之勸懲也至太師采之以貢于天子則以作者之詞而論乎聞者之志以卽事之詠而推其致此之由則一時賞罰黜陟興焉國史編之以備矇誦教國子則以諷此人之詩存爲諷人人之詩又存爲處此境而詠已詠人之漙而百世勸懲觀感

興焉。請舉三家詩例與毛詩之例質之。今所存韓詩序自關雎蝦蟆雨無正那頌四篇爲美刺外餘皆自作之詞。新序列女傳載魯詩諸序亦無一篇爲美刺。詩以言志百世同揆豈有懽愉哀樂專爲無病代呻者耶。然毛以二南皆美文王后妃之化而韓則以漢廣爲說人汝墳爲辭家芟首傷夫有惡疾毛以變雅皆刺幽厲而魯韓則以抑及賓筵爲衛武自儆白駒爲賢者招隱是三家特主于作詩之意而毛序主于采詩編詩之意似不同而實未嘗不同也。三家于關雎本義既有齊詩匡衡之疏韓詩外傳子夏之問與毛詩同而復有關雎刺時也之序見美周者卽以刺

商焉。小雅鹿鳴常棣等篇。既有鄭君儀禮之注。韓詩夫移之序。左傳富辰引周文公之語。與毛詩同。而復有周大夫彈絃諷諫。及國語召穆公作常棣之說焉。商頌既以爲正。考甫作以祀先王。與國語同。而因其樂作宋襄公之世。復以那頌爲美宋襄公焉。

詳商頌發微篇

秦風車鄰駟驥小戎皆襄

公追錄其先世之詩。而毛序爲美秦襄公。正同一例。

詳秦風答

問是三家雖主作詩之意。而亦閒及編詩奏詩之意。似自違而非自違也。毛序雖以采詩編詩之意爲主。然衡門序云。誘僖公。而傳則以衡門泌水爲賢者隱居樂道。宛邱序云。刺幽公。而傳則以子斥大夫。他如抑傳無刺厲王之意。

楚茨諸傳無刺幽王之意。考槃雄雉詩傳無刺莊公宣公之意。涇縣胡承珙曰：羔羊鵲巢之功致也。麟趾闕雝之應也。騶虞鵲巢之應也。皆合眾作而推其義例。可見序詩者與作詩之意絕不相蒙。作詩者意盡于篇中。序詩者事徵于篇外。是毛傳仍同三家。不以序詩爲作詩。似相牴而非相牴也。本三例以讀全詩。則知芣苢兔置標梅漢廣皆男女民俗之詩。而推其止乎禮義。則以爲文王后妃之化焉。雄雉伯兮君子于役。本室家思其夫。葛生本寡婦悼亡。君子陽陽。本遭亂招隱。而推其怨曠自傷之由。則以爲刺宣公刺時刺晉獻公刺平王閔周室焉。簡兮北門考槃白駒。

隰桑皆賢者自寫其情相匡以義而推其野有遺材則以爲刺不用賢刺士不得志刺莊公使賢者退處刺宣公幽王焉綢繆自敘其新昏蓼莪鴇羽自傷其父母還與盧令自夸其畋獵谷風黃鳥我行其野自責其朋友昏姻而推其征役刑政之失時風俗恥尙之失所則以爲刺晉亂刺時刺荒刺宣王幽王焉崧高以贈申伯烝民以慰山甫抑及賓筵乃武公自儆小宛乃兄弟自相戒而推本于中興之任賢板蕩之憂禍則一美宣王一刺幽王焉蓋古王者旣命公卿獻詩以爲雅樂猶恐下情壅于上聞又于每歲孟春羣居者將散則行人振木鐸以采詩且使老而無子

者求詩于巷黨之間。鄉傳于邑。邑達于國。及五載王巡狩。則與太史太師同車。命太師陳之以觀民風。而國史錄其世次。是以王者不窺戶牖而知天下。比其音律。明其好惡。則有加地進律之慶。有削地貶爵之讓。而暑雨祈寒。上聞并以發天王震戒脩省之思。凡以一國之事繫一人之本。而美惡皆歸于上。故藝文志曰。古有采詩之官。王者所以觀風俗。知得失。自考正。又曰。小雅譏已之得失。其流及上。是則風之美刺出于王朝之慶讓。雅之美刺別于王政之隆替。非必詩人之意。篇篇此美。此刺也。至若編詩以教萬世。則視采詩教一時者。其義尤曠。正風正雅諸樂章。旣以

播之朝廷鄉國其餘亦備國子矇瞍諷誦之用則一莊姜之詩而妻道夫道皆可悟焉一考槃衡門之詩而臣道君道皆可觀焉一汝墳也可序爲勉君子亦可爲美文王亦可爲刺殷紂一小星江沱也可序爲美媵妾亦可爲美嫡妃亦可爲文王之化一鴟鴞也可序爲刺武庚亦可爲誨成王亦可爲美周公遭難是故凱風七子自責也編詩者以其可教孝而序云美孝子桑中氓丰漆洧東門之墠東方之日本男女流蕩之詞也編詩者以其可戒廉恥之防而序云刺奔刺亂刺時羔裘本美大夫之正直女曰雞鳴本賢夫婦相儆鵲鳩本美君子用心之均一編詩者以其

亂世不多見美此即可刺彼而以爲刺朝刺不說德刺不
一六序所謂國史明乎得失之迹哀刑政之苛吟詠性情
以風其上蓋國史掌世系擇勸戒以授之矇瞍如畢公憂
康王之晏朝而詠關雎周大夫感賢才幽隱而絃鹿鳴召
穆公閔周宗不穆而奏常棣雖非詩人言志之初心適符
國史美刺之通例此則齊魯韓毛各有所得觀其會通以
逆其志未始不殊途同歸者也三家之得者在原詩人之
本旨其失者在兼美刺之旁義如魯詩畢公作關雎韓
詩那頌美襄公之類毛
詩之得者在傳與序各不相諫其失者在衛序鄭箋專泥
序以爲傳是故執采詩者之意爲作詩者之意則凡太師

推其致此之由歸本于上者皆謂出詩人之口故說雄雉

則不謂思君子而以爲怨上如箋云上下其音與宣公小大其聲怡悅婦人說考

樂則不謂感遇而以爲懟君如箋云誓不忘君之惡誓不

說衡門則不謂賢者自樂而以爲托喻箋釋衡門泌水皆與傳義違反說

抑詩則不以爲自傲而以爲斥厲具詳別篇而且執編詩立教

爲作詩者之意于是以凱風蓼莪爲美孝子刺幽王者之

代作以桑中蔓草東門之墠諸詩皆刺淫者之設詞則是

惻怛之什旣皆不病之呻而越人歌子夜歌楊白花皆可

爲諷刺之曲而凡刺人者皆可自陷于所刺之中也又甚

者執國史誦詩者之說爲作詩者之說如論常棣則斥國

語而忘內傳論關雎則斥三家而誣本旨及說變雅楚茨

以下則又執刺幽以矯申毛傳

毛序以楚茨以下爲刺幽王者或亦召穆公賦常棣

畢公詠關雎之類乎必非謂詩人本爲陳古刺今也

鏃舟膠瑟之見固設身易地之

義隱界鴻溝于一堂而不知畛域之自畫庸非美刺之說

久冥其原耶庸非三家之學久湮其傳耶

齊魯韓毛異同論下

齊魯韓毛異同自詩序而外尙有三端一曰篇名二曰章句三曰訓詁今各設問難以明之問曰歐陽氏修蘇氏轍謂小雅小明小[閔]之篇以別於大雅之大明召[閔]則知亦必有大宛大弁之名在大雅而佚之矣視鄭箋之說爲善鄭謂小明者幽王自小其明又小[閔]所刺比于上二篇爲小而小宛小弁則不著其說而郝氏京陳

氏啟源則謂三百篇並是作者自名舉金縢鴟鴞公所自名爲證因謂詩之篇目或太史所記或太師所目不應先有小大雅而後以詩從之且詩篇重名甚多風之杕杜黃鳥谷風甫田名與雅同白華兩見小雅柏舟無衣兩見國

風羔裘揚之水則三見何以不爲記別然則當何從曰風
區各國本無小大之殊風雅異部不嫌名篇之複笙詩佚
目何勞記別之文若夫樂章掌于太師固可審音而別其
爲小爲大矣篇目雖標間有更正如毛詩題邶柏舟鄘柏
舟叔于田大叔于田所以施于同國之風也矧詩之篇名
有三家詩異于毛者有古書所引異于毛者如韓詩常棣
作夫移齊詩還作營則安知頌之小瑟不別有以瑟名篇
大東之詩不本名小東耶節南山之篇季武子賦之但作
節維清之詩禮記下管則曰象至國語秦穆享重耳賦鳩
飛左傳趙孟賦河水韋昭謂鳩飛卽小宛河水卽沔水則

古人名篇且有不同。若皆作者自名，則異名何從生耶？曰篇目縱定于太師，章句必昉諸作者。而孔疏言毛詩經文與三家異者動以百數。歐陽修鄭樵謂三家詩幽風皆無七月者何？曰左傳成九年季文子如宋，致女公享之，賦韓奕之五章。穆姜拜于房，賦綠衣之卒章而入。韓宣子來聘，季武子賦節之卒章，則分章之來舊矣。然載馳之詩毛分五章，而叔孫豹賦載馳之四章，取控于大國，誰因誰極之義？卽今末章故蘇氏據此合二三章爲一。此毛失而左氏得也。緇衣引都人士首章，而鄭注云此詩毛氏有之。三家則亡。詩疏又引襄十四年服虔注以爲逸詩，且謂韓詩見

存實無首章然賈誼新書等齊篇引詩曰狐裘黃裳萬民之望是魯詩都人士有首章此韓失而魯毛得也雨無其極傷我稼穡爲雨無極之首毛既無首語又脫極字遂以正大夫之正屬上讀

御覽引韓詩序雨無極正大夫刺幽王也

而強說其篇義

此韓得而毛失也至于晁說之謂三家皆以王風爲魯詩其說絕無所本殆不足辨而歐陽修又謂三家詩皆無幽風姜炳璋遂據爲口實攷說文所引皆魯韓異文至說文引劉向說四月秀萋爲苦菜則魯詩有七月傳之明證御覽引韓詩四之日舉趾有薛君章句釋文于八月在宇初學記于鑿冰沖沖引韓詩說二百餘言尤韓詩有七月傳

之明證。鄭注禮用韓。而于籥章歛幽詩。歷引七月以釋之。尤韓詩七月經文之明證。歐陽之說。不知何徵。正猶史漢儒林傳藝文志。皆言魯申公爲訓故。且漢書楚元王傳及魯國先賢傳。皆言申公始爲詩傳。且漢志明載魯故。魯說皆魯詩傳之明證。而史記索隱顏師古陸德明誤。史記儒林傳無傳疑之語。遂謂魯詩無傳注。事固有絕不可解者。茲類是矣。

曰爾雅皆毛詩之訓。毛傳多釋古之文。如三家詩果出古本。豈亦有爾雅以釋之乎。曰惡。是何言也。武迹敏梅之訓。權權洩洩之釋。爲毛乎。爲三家乎。郭璞不解荊文。

韓詩荊
彼甫田

到彼釋詁字兼永兼郭注引詩證雅異于毛者以數十計

專毛訓乎抑三家訓乎爾雅注引詩曰采采芣苢云何吁矣

召伯所稅實命不猷既詒我勛畱離之子稊稊亡它齒如

河水清且漙漙胡不承權與有蒲與茄心焉惕惕四國是

訛悠悠我悝翕翕訛訛居河之湄哀我瘠人涓涓佩琇以

我列祖先集維實祓祿康矣泰風有隧錫爾玼珪莫予粦

陳氏毛詩稽古編列爾雅毛釋獸無騶虞之仁獸釋木以

傳異同甚詳皆三家詩訓也唐棣為夫移與毛合乎說文引施于中堦與

仇韻說文云堦正外傳引不可休思與求韻毛作息又引

詩是用不就與咎韻毛作集釋文楚詞注引詩歌以諄之

與萃韻毛作訊說文引何戈與殷殷示聲與芾韻毛作父

新序漢書引聽言則對與退韻毛作荅不韻鹽鐵論引六月詩

我是用戒與國韻毛作急不韻說文引去其螟蟥與賊韻毛作朕

聲伏湛傳引詢爾仇方同爾弟兄與衝墉為韻毛作兄弟以古

音求之孰合孰不合乎至于三家詩皆本字而毛皆假借

如左傳引假以溢我作何以恤我坊記引以勗寡人作以

畜寡人之類亦有毛合韻而三家不同者如我馬維駒與

為駒毛詩段借字而三家其本字也又熊羆是裘與試韻

而鄭箋從韓作求于義為勝亦毛段借字而韓本字也裘

裳涉漆與人韻而說文引詩作澣蓋漆水出桂陽臨武澣

水出鄆城西北亦毛段借字而三家本字也外侮其務聲

同發蒙與戎為韻而左傳作外禦其侮亦毛段借字而三

家本字也僨爾邊豆飲酒之飫飫者立飲成禮非兄弟之

燕當從韓詩作饌亦毛毛傳多用古訓亦不盡合古訓如

段借字而韓本字也

寺上校 上編之一 通論傳詩異同 六

以終風爲終日風緝熙敬止以爲語詞之類

大學引詩以止仁止敬釋

之鄭注大學云文王敬其所自止處又緇衣注敬其容止蓋與上下爲韻非冬日陽止征夫遑止韻在上字者比也非文王嘉止在侯子二韻之中原非韻句者則隨文觸悟比也毛傳不釋敬止止字是以爲語詞矣

存乎其人鴻都輟講家瀟淪亡可質服古之儒難語目睫

之士焉

夫子正樂論上

魏源曰古者樂以詩爲體。夫子自衛反魯而樂正。雅頌各得其所。則正樂卽正詩也。樂崩而詩存。于是有三百篇入樂不入樂之訟。鄭樵謂夫子刪詩。其得詩而得聲者三百餘篇。其得詩不得聲者。則置之逸詩。凡存者皆可以祭祀燕享。而陳陽程大昌則謂春秋列國燕享所用。未嘗出二南雅頌之外。而自邶至幽則無一篇。因謂二南雅頌爲樂詩。而諸國爲徒詩。陳陽焦竑皆從程說。不知鼓鐘篇以雅以南。禮記之胥鼓南。左氏之觀舞象箎南籥。漢儒皆釋爲南夷之樂。有樂舞而無歌詩。今指爲二南。與詩禮春秋傳

皆不合。辯在小雅答問鼓鐘篇下馬端臨則力詆徒詩之謬而仍不得

其聲樂所用。函矢相笑。冰炭無休。豈知詩有爲樂作不爲

樂作之分。且同一入樂而有正歌散歌之別耶。古聖人因

禮作樂。因樂作詩之始也。欲爲房中之樂。則必爲房中之

詩。而關雎鵲巢等篇作焉。欲吹幽樂。則必爲農事之詩。而

幽詩幽雅幽頌作焉。欲爲燕享祭祀之樂。則必爲燕享祭

祀之詩。而正雅及諸頌作焉。三篇連奏。一詩一終。條理井

然。不可增易。此外則諸詩各以類附。不特變風變雅采于

下。陳于下者。與樂章迴殊。卽二南之殷其雷。汝墳。行露。甘

棠。幽之破斧。伐柯。頌之訪落。閔予。小子。小毖。敬之。凡因事

抒情不爲樂作者皆不得謂之樂章矣。然謂皆徒詩而不入樂乎？則師曷肄習之何爲？然則其用之奈何？曰：一用于賓祭，無算樂再用于矇瞍，常樂三用于國子絃歌。

儀禮燕鄉賓射皆于升歌笙閒合樂之後，工告正歌備乃繼之以無算爵，亂之以無算樂，無算云者，或閒或合，盡歡而止。若季札聘魯觀周樂，豈能一日徧歌三百篇，亦豈能若正歌三終之確有定數？且鄉飲鄉射皆于明日息司正，曰鄉樂惟欲則二南，自首三篇外，亦可隨意歌之。此散歌散樂一用也。

禮樂莫大于賓祭，而不止賓祭。魯樂工有亞飯三飯，則每

食有樂國語宴居有工師之誦鄭譜有路寢常樂之文則
閒居有樂而周禮磬師教燕樂縵樂之鐘磬鎛師掌愷歌
愷樂樂之用廣則詩之用廣漢時雅樂可歌者八篇而變
雅之白駒變風之伐檀與焉至于工以納言時而颺之師
箴睪賦矇誦大夫彈絃諷諫國史采眾詩授矇睪使歌之
以風其上詩大序疏則有時于常樂寓箴規衛獻公宴孫蒯使
太師歌巧言之卒章魯宴慶封使工爲之誦茅鴟則又于
燕享無算樂中而時兼諷刺故毛傳于卷阿篇云明王使
公卿獻詩以陳其志遂爲工師之歌崧高篇云吉甫作是
工師之誦而大戴保傳篇云宴樂雅誦逆序此詔工之任

也是散歌散樂又一用也。

大司樂以樂歌教國子。毛公言古者教以詩樂歌之誦之

絃之舞之。則習詩卽所以習樂。是故碩鼠在變風而甯戚

能歌之。

呂覽高誘注及後漢書馬融傳注引說苑善說篇

商頌乃勝國樂章而曾

子能歌之。

莊子

史遷三百篇。孔子皆絃歌其聲。墨子言儒者

誦詩三百。絃詩三百。歌詩三百。舞詩三百。是周時無不入樂之詩。此散歌散樂又一用也。

蓋樂主人聲而律和之。合歌者之詩。與擊者拊者吹者之器。而始謂之樂。故儀禮升歌三終。閒歌三終。與笙入合樂。皆謂之正樂。若夫徒吹謂之和。徒歌謂之謠。爾雅不歌而誦

謂之賦

班固兩都賦序

則與樂絕不相入

初學記韓詩薛君云有章曲曰歌無章曲曰謠

藝文志曰誦其言謂之詩詠其聲謂之歌毛詩傳合樂曰歌徒歌曰謠

故魯享季武子武子

賦魚麗之卒章公賦南山有臺鄭燕穆叔賦采芣燕享

時既閒歌合樂此三篇矣而賓主又舉之爲賦豈非各爲

一事絕不相蒙而諸儒尙據列國賦詩以證入樂謬矣然

則以入樂言之則變風變雅不但無不可歌亦無不可用

以儀禮正歌言之則不但變詩不得與卽正者亦有不得

與何者周公時未有變風變雅而已有無算樂則知凡鄉

樂自樛木甘棠以下諸詩大雅召康公諸詩周頌成王諸

詩亦止爲房中賓祭之散樂凡詩不爲樂作而可入樂者

皆是也。自唐以來，惟孔氏正義詩譜疏謂詩本樂章，禮樂既

備，後有作者，無緣增入。其二雅正經而外，雖用于樂，或爲無算之節，或隨事類而歌。又在制禮之後，樂不常用云云。深悉源流，而近儒陳啟源輩不知祖述橫生異端，欲回護大雅諸序空衍之失，遂謂古人詩樂分爲二教，故序詩者不必言其所用，用于樂者不必與詩本意相謀，反斥後儒舍詩徵樂爲異乎古人之詩教。噫，諄諄甚矣！大司樂以樂語教國子，興諷誦言語，太師教六師以六德爲之本，以六律爲之音，瞽矇諷誦詩，奠世繫掌九德六師之歌，以役太師。季札請觀周樂而爲之歌，二南歌風歌雅頌詩與樂曷嘗

判然二教。且歌詩必類。惟合樂不必取類。如鄭譜言詩之入樂。國君以小雅。天子以大雅。而饗或上取燕。或下就。如天子饗元侯。歌肆夏。案肆夏有奏無歌詳下篇合文王諸侯歌。文王合鹿鳴。天子諸侯燕羣臣及聘問之賓。皆歌鹿鳴。合鄉樂。蓋合樂惟主聲。而歌詩則兼取義。豈得以合樂之不必類。而并誣歌詩之無取義乎。二南合于鄉樂。可謂與燕射不類。若其本爲房中之樂。豈得亦謂不類乎。文王之三。用于兩君相見者。特其通用之一端。文武起自侯服。故陳天命之靡常。王業之不易。以告爲君者。亦非無取義也。至其本所由作。則儀禮天子之禮亡。豈得徒據

春秋傳偶用一事乎。鵲巢樂會時。詳下篇采蘋樂不失職。采

蘋樂循法度。騶虞樂官備。以及南有嘉魚樂與賢。南山有
臺樂得賢。皆謂奏諸樂以樂之也。禮樂以諭君子。故賓主
皆不言。而以樂將其情。豈借用爲射節閒歌。而遂謂與樂
不相謀。且毛序所不能言者。惟大雅樂章耳。至周頌爲祭
祀之樂。正小雅爲燕享之樂。則亦篇篇言之。且于四牡傳
發其例曰。周公作樂以歌文王之道。爲後世法。而笙詩六
篇。必依儀禮樂節存于閒歌之中。豈不違古人詩樂分教
之意乎。此猶以正雅言也。卽以變雅言之。如崧高毛傳。吉
甫作是工師之誦。則固爲燕樂之用矣。斯干箋謂築宮廡
羣寢旣成而疊歌斯干以落之。則亦考室樂章矣。月令大

雩祭用盛樂鄭謂吁嗟求雨之祭賈公彥謂邦之大裁則歌哭而請雩漢之詩是也則亦宣王雩祭樂章矣諸詩蓋皆承王命爲之崧高承王命以贈申伯而烝民韓奕從可知斯干承王命以嘏祝而無羊從可知雲漢承王命以告神而六月采芑出車采薇杜常武江漢之爲愷樂饒歌以勞還師可知車攻吉日之爲田狩會同時燕樂亦可知而庭燎河水之規誨必皆授之矇瞍彈絃諷詠以達于王矣是以晉魏時大雩祈旱皆歌雲漢之章蔡邕述琴有白駒之操至于楚茨公侯祭祀之樂大田豳雅之樂采芣錫諸侯命服之樂又不可以變雅論矣是知雅詩甫作卽入

工師之誦雖殊正雅專制之樂章固勝國風巷采之謠諺而謂變雅亦不入樂乎

曰荀子言詩三百篇中聲所止史記謂詩三百篇孔子皆絃歌之以求合于韶武之音豈非聲之與義各不相謀耶曰詩三百篇皆中聲所止者宮成其宮羽成其羽是謂中聲鉅不過宮細不過羽是謂中聲所止非皆和平中正之謂彼以凡詩皆中聲者試問三百之詩果皆如世所傳風皆角調小雅徵調大雅宮調周魯頌皆羽調商頌商調耶此見律呂正義又熊朋來亦言嘗杜門彈瑟以養賓之角歌考槃知凡風皆角調此殆泥樂記角爲民之說攷詩緯含神霧曰魏地處季冬之位土地平夷秦地處仲秋之位男懦弱女高療音中商其言舌舉而仰聲清而揚陳地處

季春之位土地平夷無有山谷律中姑洗音
中宮徵則知列國殊音而風不皆角調矣抑列國變風

哀心感者其聲噍以殺樂心感者其聲嘽以緩喜心感者

其聲發以散怒心感者其聲粗以厲卽變雅噍殺猛起之

音何一不有耶則知歌必永言聲必依永但其用于樂有

正歌散歌不同且季札觀周樂于鄭于陳並直詞譏之自

鄆以下譏亦不屑若謂皆合于韶武之音則何以審音而

知政耶劉勰樂府篇曰詩爲樂心聲爲樂體好樂無荒晉風所以稱遠伊其相謔鄭國所以云亡故季札觀

辭不直聽聲而已若夫豔歌婉孌怨志詆絕史遷旣言三
淫詞在曲逸響奚生詩聲俱鄭自此階矣

百篇皆絃歌以求合韶武之音及作樂書則又曰雅頌之

音理而民正鄭衛之曲動而心淫又與韶武之音相反何

耶

詩古改

上編之一

通論詩樂

五

夫子正樂論中

魏源曰夫子有正樂之功無刪詩之事夫刪詩之說何昉乎自周秦諸子齊魯韓毛四家以及董仲舒劉向揚雄班固之著述皆未嘗及惟史遷因夫子刪書而并爲刪詩之說謂古詩三千孔子去其重取可施于禮義者凡三百五篇是說也孔穎達卽疑之謂書傳所引多存少佚不應夫子十去其九今攷國語引詩三十一條惟衛彪傒引武王飫歌及重耳賦河水爲逸詩而韋注又以河水卽沔水則是逸者僅三十之一也左氏引詩二百十七條其閒邱明自引及述孔子之言者四十有八而逸詩不過二條

成九年雖

有絲麻六句襄五年周道挺挺四句是也。列國公卿引詩襄三十年淑慎爾止二句疑抑詩異文。

百有一條而逸詩不過五條。莊二年翹翹車乘四句襄八年俟河之清四句昭四年禮

義不愆二句昭十二年祈招之詩列國宴享歌詩贈答七

十條而逸詩不過三條。茅鳴桑林轡之柔矣是也其是逸河水新宮有謂今詩異名者

詩不及今詩二十之一也使古詩果三千有餘則自后稷

以及殷周之盛幽厲之衰家絃戶誦所稱引宜十倍于今

以是推之其不可通一也古詩之不可刪者莫如官禮樂

章之宜備莫如國風正變之宜賅使所見果有三千之全

而昭代樂章尙大半不與焉列國正變之風又大半不與

焉則竹簡充棟果皆何詩豈元公制作尙煩甄別且季札

觀樂何已無出十五國耶其不可通二也至宋歐陽氏刪章刪句刪字之云者姑無論素絢尙絢未爲聖論所非唐棣懷人本自斷章取義彼室邇人遠曷嘗不存于詩雲漢小并何嘗不煩逆志矧夫助語單文三引三異盡謂害詞害志毋乃高叟復生其不可通三也然則史記謂古詩三千者殆猶書緯稱孔子得黃帝之孫帝魁之書迄于秦繆公凡三千三百四十篇孔子刪之爲尙書百二十篇以十八篇爲中候又春秋緯稱孔子將修春秋使子夏等求得百二十國之寶書今春秋所載諸國不及二十古詩三千殆亦是類皆秦漢學者侈言匪實史遷襍采輕信而遽謂

出魯詩過矣。且夫刪詩之說，不過據逸詩爲詞，而吾之謂不刪詩者，則直以夫子之後無逸詩爲斷。何則？所謂逸者，必逸于夫子之前。如國子賦鸞柔，穆子賦茅鴟，而後可。亦必國策諸子所引，或出聖門傳授之外，而後可。若夫子而後，七十子所稱述，如子思引衣錦尚絅之云，曾子引涓涓原水不離不塞六語，荀子法行篇其必刪授之經明矣。而今詩無有焉。且荀子爲詩禮大宗，漢四家詩所出，其所稱宜三百篇文矣。而王霸篇解蔽篇兩引詩，無有焉。法行篇臣道篇兩引詩，亦無有焉。正名篇引禮義不愆，何恤人言云云，則與子產所稱同。而今詩亦無有焉。豈七十子所稱反皆

刪削之遺耶左氏所招之詩夫子既聞而善之說苑夫子

稱詩云皇皇上天其命不忒天之以善必報其德而坊記

載子曰詩云相彼盍旦尚猶患之注曰盍旦夜鳴求旦之鳥也求不可得人猶惡

其欲反晝夜而亂晦明况乎臣之僭君亂上下惑眾乎不言逸詩緇衣載子曰詩云昔吾

有先正其言明且清國家以圖都邑以成庶民以生誰能

秉國成不自為政卒勞百姓注不言逸詩釋文曰前五句今詩皆無之餘在節南山篇

或逸詩也案鄭氏禮注之例凡詩見存者皆不注其篇名其不存者則注逸詩故知以上二條不言逸者必三家詩

矣釋文亦但或夫子既引之以垂訓矣而編詩時復逸之

之或者疑之也又何以稱焉宋書樂志謂坊記緇衣乃子思子書則所稱亦必夫子經文若謂逸於夫

子之後如毛所謂六笙詩亡于秦火云者則必啟王柏輩

疑經之漸坐漢儒以掇拾湊成三百之數矣。吾則以齊魯韓三家異文證其說曰。今所奉爲正經章句者毛詩耳。而孔疏謂毛詩經文與三家異者動以百數。故崔靈恩載殷頌末三家有於繹思一語。而毛無之。後漢陳忠疏引詩云以雅以南。韎任朱離。注謂出齊魯詩。而毛無之。韓詩北宋尙存。見于御覽。乃劉安世述雨無正篇首有雨無其極傷我稼穡二語。而毛無之。至選注引韓詩經文有萬人爾雅仰天告愬二語。鄭司農周禮注述三家詩云。敕爾瞽率爾眾工。奏爾悲誦。則今并不得其何篇。王氏詩考以萬人爾雅二句繫之節南山下使不知爲三家經文。必謂夫子筆削之遺無疑矣。至若

緇衣左傳引都人士首章而鄭君服虔之注并以爲逸詩
孔疏謂韓詩見存實無首章然賈誼新書等齊篇引詩曰
狐裘黃裳萬民之望是魯詩有都人士首章而韓逸之也
左傳引詩何以恤我我其收之明是周頌之異文而杜注
以爲逸詩是皆但據毛詩之蔽也夫毛以三家所有爲逸
猶韓以毛所有爲逸果孰爲夫子所刪之本耶是逸詩之
不盡爲逸有如斯者推之韓詩常棣作夫移齊詩還作營
韋昭謂鳩飛卽小宛河水卽沔水是逸篇不盡逸有如斯
者其他篇次參差未遑殫述是以班固謂詩遭秦而存者
以其諷誦不獨在竹帛口授旣久差池自生然則曾子子

思荀子所引者果盡爲夫子所不錄三家所咸無耶左氏
說苑禮記載夫子自稱詩云者其果亦害詞害志而復自
刪之耶再推之則左傳澶淵之會引詩云淑慎爾止無載
爾僞乃抑篇之歧句毛詩作不愆于儀儀從我聲漢書引平秩南訛作南
儀儀從我聲漢書引平秩南訛作南
爲說文引詩民之訛言作
謫言則訛僞爲同字同韻荀子臣道篇引詩云國有大命
不可以告人妨其躬身禮坊記引詩云相彼盍旦尙猶患
之緇衣引詩云誰能秉國成不自爲政卒勞百姓漢書引
詩云四牡翼翼以征不服烏知匪揚之水小弁節南山六
月之文而謂皆刪章刪句刪字之餘耶世之說詩者吾惑
焉于韓詩多雨無極二語則以章句不齊而疑之毛詩首
二句與

篇名無涉當從韓詩至首二章
章八句則韓詩仍無所增也于三家詩之抑篇鼓鐘出

車黍離等篇則以篇什偵倒而嗤之
孔疏謂鄭風清人脫
刪失次張衡謂幽風

諸詩顛倒不次則毛詩篇第皆人議之矣夫以毛詩之章句例韓詩以毛詩之

篇第繩魯詩而斷其不然何怪刪詩之誣千載耳食矣曰

必求三家外之逸詩有之乎曰國策甘茂引詩曰行百里

者半于九十又見賈誼疏不以爲詩也范睢引詩曰木實

繁者披其支披其支者傷其心又見周祝解則亦非詩也

黃歇引詩曰樹德莫如滋除惡莫如盡姚氏本作引書則

亦非詩也呂覽引詩曰將欲毀之必重累之將欲路之必

高舉之國策引作周書則亦非詩也呂覽愛士篇引詩曰

君君子則正以行其德君賤人則寬以盡其力亦不似詩也。蓋古語多用韻。後人或引爲詩。而實非詩者多矣。善乎魯詩班固之言曰。孔子純取周詩。上取殷。下取魯。凡三百五篇。曰。純取者。明無所去取其閒也。因是以通史記之言曰。孔子去其重。取可施于禮義者。凡三百五篇。曰。去其重者。謂重複倒亂之篇。而非謂樂章可刪。列國可黜也。吾故曰。夫子有正樂之功。無刪詩之事。三家之本有同異。則三百之外。不盡逸詩也。

夫子正樂論下

問曰近儒朱彝尊亦力主正樂不刪詩之說曰刪六笙詩而閒歌有詩笙入無詩矣刪九夏而王出入尸出入皆無樂矣刪貍首而天子有節諸侯無節矣刪新宮而升歌有詩下管無詩矣然謂刪于夫子之前固不可若毛序于六笙詩謂有其義而亡其詞鄭箋固謂亡于孔子之後矣貍首詩固至今存于禮記驪駒新宮之詩固尚存于兩漢斯皆逸于既刪之後曷不盡取爲三家詩異同之證耶曰以六笙詩之序爲夫子所有大惑不解者一以貍首采齊九夏之屬皆古詩樂章大惑不解者二請一一決之漢書言

詩遭秦而存者以其諷誦不在竹帛果如笙詩鄭箋謂眾篇之義合編故存其詞遭秦而亡則是存亡皆以竹帛不以諷誦矣且齊魯韓毛四家文字異者動以百數而篇目並同如果夫子之經必不亡則俱亡當有一家存之者矣且旣存其序則宜得詩人之意乃止就篇名望文生義由庚則謂萬物得由其道崇邱則謂萬物極其高大由儀則謂萬物各得其宜乃至白華以潔白爲義華黍以歲豐爲義南陔以陔戒爲義何異郭茂倩之樂府解題六朝人之擬古雉子斑惟詠雉烏夜啼惟詠烏豈知詩之名篇惟取首字如泉水竹竿四月七月丰還駟那之類有全非取義

者耶若謂六笙詩序三家詩或亦有之則班固藝文志曰
孔子純取周詩上取殷下取魯凡三百五篇龔遂謂昌邑
王曰大王誦詩三百五篇王式曰臣以三百五篇諫史遷
曰孔子去其重取可施于禮義者凡三百五篇以及王充
之論衡趙岐之孟子後敘樂緯尙書緯詩緯皆無稱三百
十一篇者而張揖之注上林賦則明云大雅之材三十一
人小雅之材七十四人皆不數笙詩之明證如謂三家詩
或有其序則鄭注禮時用韓詩而其注鄉飲酒禮于此六
詩皆云今亡其義未聞賈疏云鄭君注禮時未見毛傳以爲此篇孔子前亡注詩之時用毛
傳以爲孔子後失則三詩無此序明矣乃知夫子一則曰詩三百

再則曰誦詩三百者蓋始關雎終魯頌其全數如此王通所謂詩三百始終于周也其後于宋得頌五篇因附其後以爲餘數則夫子時亦無六笙詩明矣毛公雖按儀禮樂章依數以排之望文以說之然尙列什外則亦不以爲夫子原目自鄭箋謂毛推改什首後人遂列入什中而更南有嘉魚之什爲南陔之什并數爲三百十有一篇遂眞若夫子有之而亡于秦火者姜炳璋至謂夫子刪詩三百成數而外約尙有二十餘篇如采齊新宮貍首九夏之屬皆在其中而亡于秦漢豈非歧中又歧不可窮詰者乎至貍首逸詩則豈特夫子所未見三家所咸無而吾直謂樂章

所未有何者。周禮樂師凡射。王以騶虞爲節。諸侯以貍首爲節。卿大夫以采蘋爲節。士以采芣爲節。鄭氏謂騶虞等三詩皆在國風召南。惟貍首在樂記射義。然則周初此詩于樂章果何屬乎。編於召南則詩不類。編于雅則武王時散軍郊射。右射騶虞。其時雅頌未作。故天子大夫士之節皆用召南。何以獨遺鵲巢國君之詩。而別製貍首之雅。其可疑一也。歌詩以爲發矢之節。詩不容長。故騶虞采蘋諸篇皆章三四句。而大戴禮投壺篇載貍首詩曰。曾孫侯氏今日大射。張侯參之。四正具舉。大夫君子。凡以庶士。小大莫處。御于君。所以燕以射。則燕則譽。此首章亦見射義質參既設。

執旌旣載千侯旣亢中獲旣置弓旣乎張四侯且良決拾有常旣順乃讓乃揖乃讓乃躋其堂乃節其行旣志乃張

此二章

射夫命射射者之聲御車之旌旣獲卒莫曰嗟爾不

甯侯爲爾不朝于王所故亢而射女強食食爾曾孫侯氏

百福

此三章

其詩不類風體煩而不可爲節可疑二也先鄭

周禮注以狸首爲曾孫後鄭儀禮注狸之言不來也其詩有射諸侯不來朝者之言因以名篇後世失之考全詩無狸首字而篇名狸首則是畫狸首爲鵠而射之故詩有亢而射女之言豈先王建萬國親諸侯之義且武王克商散軍郊射右射騶虞左射狸首而貫革之射息若射狸以威

諸侯其不仁甚于貫革安得與騶虞歎仁人之詩爲左右
節乎且射義當云諸侯以貍首爲節畏失時矣安得云樂
會時乎可疑三也大戴投壺記曰凡雅二十六篇八篇可
歌鹿鳴貍首鵲巢采芣采蘋伐檀白駒騶虞又八篇廢不
歌其七篇商齊可歌也三篇閒歌攷二雅之材百有五而
云二十六鵲巢采蘋采芣騶虞則商樂伐檀則變風而皆
以爲雅商齊七篇不知何詩若樂記商者五帝之遺聲齊
者三代之遺聲則皆在雅頌以前何以亦謂之雅是夫子
得所之雅頌已殘缺于秦灰而夫子未見之貍首反獲全
于末學且小戴投壺又無此記其可疑四也

詩譜曰今無
貍首周衰諸

言一
侯並僭而去之。夫子錄詩不見也。爲然則如之何。曰是非禮樂之記者後存之。遂不得其次序。

周公樂章也。爲是詩者其甚宏乎。史記封禪書周靈王時諸侯不朝。甚宏乃明鬼神事。設射狸首。狸首者諸侯之不來者也。徐廣曰狸一名不來依物怪欲以致諸侯。諸侯不從而晉人

執殺甚宏。漢書郊祀志亦載此文。作設射不來。正合詩中射不甯侯之語。而狸狸同字。

釋文狸力追反

狸來同音。則是詩出

甚宏明矣。漢初周官儀禮初出屋壁。皆古文科斗。儒者習聞俗射有狸首之詩。而求諸禮經。見鼯巢篆文與狸首形近。遂舉樂師大射儀之諸侯以鼯巢爲節者。一切讀爲狸首。後儒遂載其詩于射義投壺之記。然記中雅二十六篇

小雅僅鹿鳴白駒大雅及頌則無一篇而惟召南之雝巢

采芣采蘋騶虞四詩具存正以投壺屬射禮故獨存射節

之詩投壺禮主人奉矢司射奉中鄭注投壺射之屬也故射人奉之而射義所云樂會時

春蓋取鵲巢嘉禮會合之得時以寓諸侯賓禮朝會之及

時若奏貍首而射之諸侯何樂之有乎北宋劉氏徹七經

小傳曾見及此而未審貍首之何昉故王應麟以投壺記

有貍首復有鵲巢疑之苟知其誤始于東周射侯之時成

于漢儒記禮之日則知非刪非佚非禮非詩直與夫子無

涉而凡客歌騶駒主人歌將毋庸歸之類不見于經者亦

可例推矣亦猶文王稱王周公踐阼魯賜天子禮樂皆不

見于經不見于孔子子思孟子所述而獨盛傳于後儒蓋

周末侯王以是自文其僭猶舜臣堯伊尹割烹要湯孔子主寺人皆戰國策士傳會自文

而孟子辭不獨惡其害已而去其籍矣曰然則有謂笙詩

有聲無詞鄭樵而肆夏即時邁繁遏卽執競渠卽思文卽周

禮九夏之三者鄭引呂叔玉說也韋昭曰肆夏一名渠采齊卽

楚茨禮記趨以采齊鄭注齊當爲楚齊之齊保傅新宮卽

斯干者孰爲得失曰是皆大可惑者也夫九夏采齊皆金

奏有聲無詞也而反以爲頌之族類鄭周笙詩管詩本逸

于夫子之前也而反一以爲無詞一以爲在小雅豈知鐘

師以鐘鼓奏九夏烏有歌詩而用鐘鼓者乎大射儀賓及

庭奏肆夏其時工歌尙未入非詩屬工歌夏屬金奏乎

雅

至笙簫管簫之竹音則可與人聲相和故詩之可簫見

于周官

籥章獻曲詩
幽雅幽頌

詩之可管見于二禮

下管象下
管新宮

詩之

可簫見于國語

叔孫穆子聘晉晉
伶簫詠鹿鳴之三

且儀禮太師告樂正曰

正歌備則是升歌三終笙入三終閒歌三終合樂三終爲

樂凡四節爲詩十有八篇皆謂之正歌而可謂有聲無詞

乎拊毛者謂笙詩本無詞申毛者謂金奏亦有詞正同齊

楚之得失況九夏乃前代之樂何者周樂雖備六代而惟

以夏樂與大武教民又頒之諸侯使事其先公故記言男

子二十而舞大夏又曰朱干玉戚冕而舞大武皮弁素積

楊而舞大夏又曰朱干玉戚以舞大武八佾以舞大夏穀
梁曰舞夏天子八佾諸侯六佾大夫四佾何休曰取夏樂
者與周俱文也非若雲門大咸大卷大磬大濩惟掌于大
司樂而不以教天下不以頒諸侯考尚書大傳曰維五祀
奏鐘石論人聲招樂興于大麓之野譏然乃作大唐之歌
招爲賓客雍爲主人鄭注曰招雍皆樂章名始奏肆夏納
以孝成舜爲賓客而禹爲主人鄭注肆夏孝成皆樂章名始謂尸出入時也納謂薦
獻時是肆夏明爲禹之樂章而玉夏昭夏納夏章夏齊夏
族夏祗夏醵夏從可知矣屈原曰啟九辯與九歌可見夏
樂以九爲數矣漢書言王者未作樂之時因先王之樂宜

于世者以深入教化于民

董仲舒傳

逸周書武王克商告廟萬

獻明明三終籥人奏崇禹生開三終

世倅解

此時未作樂而

所奏則崇禹之章則知先用前代大夏之樂以定夏教尙

文之治至夫子爲邦而以韶武易大夏焉則正朔三而改

文質再而復其或繼周者雖百世可知也至若采齊與肆

夏同爲行趨之節鄭注周禮本謂樂名而逸詩特兼存之

說茨薺特音韻之同

說文引薺有茨作牆有薺

未嘗謂在小雅且金奏

九夏皆用于王出入口出入牲出入公出入賓客出入之

際故有樂無詩矧趨走之促節烏容楚茨之長篇行中和

鸞豈有章句耶余于小雅力主三家無笙詩而獨不取有

聲無詞之說。力主楚茨。非刺幽。而亦不取采齊。卽楚茨之說。力主夫子不刪樂章。而不用九夏采齊。豳首皆逸詩之說。亦實事求是而已。至下管新宮。見于儀禮燕射之樂章。而或以宣王斯干當之。尤無譏焉。吾故以三言斷之曰。金奏之屬。是樂非詩。笙管之屬。是佚非刪。豳驪之屬。非詩非樂。

附攷樂章節次

樂與詩相表裏。自毛序不能得其樂章所用。而陳啟源遂力言詩與樂渺不相涉。使學者于禮樂崩壞之餘。欲聞古制彷彿而不可得。豈知詩爲樂章。欲明詩

必先明樂。金壇于氏振曾考其節奏先後，可以求樂章之所用，而正俗說之無稽。大凡奏樂有四節，其始奏曰升歌，凡升歌必以四始，故燕飲俱升歌。鹿鳴、大饗及祭宗廟則升歌清廟。此天子宗廟之祭。若諸侯宗廟則或借歌文王大明、縣大夫則當歌采蘋等篇。至商頌猗那、烈祖則商人祀先王所升歌，與周制同例也。是爲第一節。升歌既畢，由是而鄉樂則笙入，大饗下管象武，王燕下管新宮。若鄉飲酒及燕禮，笙入立于縣中，奏南陔、白華、華黍，此爲第二節。由是而閒歌，惟大射閒，豷首卽鵲巢。見上篇鄉射則不歌，不笙，不

閒其鄉飲酒及燕禮俱閒歌魚麗三篇不笙然天朝

之樂閒歌不惟有笙且有鐘磬有鼗

虞書笙鏞以閒周禮笙師凡祭

祀其其笙鐘之樂既瞭凡樂事播鼗擊頌磬笙瑟皆王禮也

較鄉國之樂于器爲

備是爲第三節此三節以前堂上堂下之樂皆不並

作堂上奏石絲以詠歌之堂上堂下歌瑟及笙並作

焉儀禮之合樂三終鄉射燕禮皆同洋洋盈耳亂之

以無算樂者也然此可謂之合樂而不可謂之大合

樂大合樂者必編六代之樂而合奏之大司樂之大

合樂以致鬼神周頌有瞽之大合樂皆大章咸池韶

夏漢武並作孟子所謂集大成者也若儀禮之合樂

僅一代之樂。孟子所謂小成者也。朱子一音自爲始。終曰一小成。集眾音之小成爲一大成。則是以笙管之三終爲小成。不知終不可曰成。必至合樂乃可謂之成。故論語繫成于翕純嘏繹之後。所謂工告樂備者是也。惟舞之成可以數計。而在音備之後。大司樂分樂之祭。皆先奏次歌而終之以舞。明堂位舞大武大夏皆在下管之後。大武之再成以至六成。書之簫韶九成皆主舞言。亦不聞以小大言。

問曰世儒皆謂祝以作樂。故以止樂。與孟子金聲玉振始終條理不合者何。若謂祝故皆堂下器不能先

堂上之樂而作則鐘鼓亦在堂下而金得先聲者何
虞書戛擊明球在搏拊琴瑟之先而玉謂之振者何
曰虞周樂制不同虞書言下管鼗鼓而後合止祝敔
是祝亦合樂時所用不用諸琴瑟未作之先至金奏
在升歌之前者仲尼燕居言大饗之禮兩君相見入
門而縣興又云入門而金作在升歌清廟之前不得
以金作在堂下而不可爲先聲商頌鼗鼓簫管依于
鼗聲而簫管在旣備乃奏之後則是樂之將終而後
擊鼗與虞樂節奏不同不得以戛擊鳴球之文而疑
玉不可爲振是周之合樂集六代之大成猶孔子集

羣聖之大成歟

問燕禮記若與四方之賓燕有房中之樂鄭注房中者后夫人所諷誦以事其君子絃歌周南召南之詩而不用鐘磬之節至磬師教纓樂燕樂之鐘磬注又謂燕樂房中之樂所謂陰聲備金石二注自相乖異者何曰考漢書禮樂志安世房中歌唐山夫人作其源出于周房中樂而首章卽云高張四縣樂充宮庭隋書音樂志皇后房內之樂柳顧從毛萇侯苞孫毓有鐘磬之說牛宏取王肅陳統不用鐘磬之說考周禮笙師祭祀饗食供其鐘笙之樂燕樂亦如之關

雖三章卽言鐘鼓樂之則房中燕樂有鐘磬明矣
曰然則諸侯大夫士用樂之等差若何曰大夫而下
僅有金石絲匏四音小胥所掌卿大夫判縣士特縣
是士僅特磬而得兼有絲匏者鄉飲鄉射二禮有磬
有笙其升歌皆鼓瑟說者謂鄉大夫詢眾賓賢故降
用士禮明士得有琴瑟笙但無大夫之金奏也若八
音之備自諸侯始燕與大射諸侯之禮也而皆有下
管有建鼓又王賜諸侯樂則以祝將之賜伯子男樂
則以鼗將之是諸侯得兼有竹木革音至土音則與
竹音相應故詩兩言如壎如箎伯壎仲箎大夫以下

無竹則亦不得有土也。故知八音之等差上可兼下。
下不得僭上。大夫歌雍舞佾。諸侯舞大武大夏。皆見
斥于春秋。此夫子正樂之大略。

詩古微上編之一